

- *1. صدر جمہوریہ درویدی مُرمو نے اج نوی دہلی ماہہ 5 وین قومی آبی اعزاز 2023 غا موقع ور اعزاز تقسیم کیا ہیں۔
- *2. فوجی سربراہ جنرل او پندر دیویدی نے کہیو ہے جے بھارت تے چین بشکار اعتماد غی بحالی اک اہم شرط ہے۔
- *3. نائب وزیر اعلیٰ سریندر کمار چودھری نے دسیو ہے جے حکومت بکھ بکھ نوجواناں ناہہ متحرک کرن کاطر پُر عزم ہے۔
- *4. تے مرکزی وزیر ڈاکٹر جتندر سنگھ نے کہیو ہے جے مشن کرم یوگی نے نظم و نسق ماہہ اک نوی ثقافت ناہہ فروغ دتو ہے۔ جہیڑو جوابدہ، متحرک، تے عصری بھارت سنگ وابستہ ہے۔

خبران غی تفصیل نال پہلاں اشفاق عدیم۔

Prez Award

صدر جمہوریہ درویدی مُرمو نے اج نوی دہلی ماہہ 5 وین قومی اعزاز 2023 تقسیم کیا ہیں۔ یہ انعامات 9 زمران ماہہ 38 جیت حاصل کرن ناہہ دتا گیا۔ جن زمران ماہہ انعام دتا گیا ہیں اُن ماہہ بہترین ریا ست، بہترین ضلع، بہترین گرائیں پنچایت، بہترین شہری بلدیاتی ادارہ تے بہترین سول سماج شامل ہیں۔ صدر جمہوریہ نے کہیو ہے جے جل جیون مشن غے تحت مُلک غا 78 فیصدی علاقان ماہہ نل غے ذریعے پانی پچایو گیو ہے۔ محترمہ درویدی مُرمو نے جانکاری دیتاں واں دسیو ہے جے یوہ مشن 2019 ماہہ شروع ہوؤ تھو جد صرف 17 فیصد دیہی علاقان گا لوک صاف پانی پئیں تھا۔ صدر جمہوریہ نے مزید کہیو ہے جے جل جیون مشن غے تحت دیہی علاقان ماہہ رہن آلا لوکان غی زندگیاں ماہہ کافی بہتری آئی ہے تے اُنہاں نے کہیو ہے ریا ستی سرکاراں نے اس مشن ناہہ کامیاب بنان ماہہ اہم کردار ادا کیو ہے۔ مہارا نمائندہ نے خبر ثوری ہے جے قومی آبی انعام 2023 حاصل کرن ماہہ پہلو مقام اڑیسہ ریا ست نے حاصل کیو ہے جد کہ اُتر پردیش نے دوجو تے اس طرح گجرات تے پڈوچری نے تیجو مقام حاصل کیو ہے۔ ہر اک شعبہ ماہہ انعام جتن آلاں ناہہ اک ثرافی تے گجھ اک نقد انعامات سنگ نوازیو گیو ہے۔ قابل ذکر ہے جے قومی آبی اعزاز سنگ اُن تنظیمان تے بالخصوص اُن افراد ناہہ نوازیو جا ئے جہیڑ اچے مُلک پھر ماہہ سرکار غا جل سمردھ بھارت غا نظریہ ناہہ پورو کرن بارے کم کریں۔

Army Chief Inida China

فوجی سربراہ جنرل اوپندر دیویدی نے دسیو ہے جے بھارت تے چین بشکار اعتماد ناہہ بحال کرنو دوہاں مُلکان واسطے اہم شرط ہے۔ وے اج نوی دہلی ماہہ اک اجلاس سنگ خطاب کرتاں واں بول رہیا تھا۔ اُنہاں نے کہیو ہے مشرقی لداخ ماہہ اصل قبضہ لکیر بارے ہون آلا 2020 معاہدہ ور غور و خوض کرنو وے گو۔ تقریب غے دوران جنرل موصوف نے اک کتاب

"A Life under fire in Kashmir"

غو اجراء وی کیو۔ نال ہی اُنہاں نے بھارتی فوج ناہہ اک جدید تے چُست فوج ماہہ تبدیلی بارے وی اپنا خیال غو اظہار کیو۔

Jaishanker Agreement

وزیر خارجہ ڈاکٹر ایس جے شنکر نے مشرقی لداخ مانہہ اصل قبضہ لکیر آلے پا سے گشت کرن غا انتظامات ور بھارت تے چین غے درمیان ہوا معاہدہ غی تعریف کی ہے۔ جناب شنکر نے کہیو جے دوئے ملک اپنی جگہ چلا گیا ہیں۔ تے اس طرح موجودہ صورتحال سال 2020 غی طرح ہے۔ وزیر خارجہ نے مزید کہیو جے اس طرح دوئے ملک ہن آرام سنگ گشت کر سکیں جس طرح جے وے سال 2020 مانہہ کریں تھا۔

Army Drone

ضلع پونچھ مانہہ قبضہ لکیر غے نیڑے بھارتی فوج نے اک پاکستانی ڈرون دیکھن توں بعد کجھ راؤند گولی چلائیں۔ ذرائع غے مطابق ڈرون نانہہ قبضہ لکیر ور منڈلاتاں دیکھ غے کجھ راؤند فائر کیا گیا تا نجے خطرہ نانہہ ختم کیو جا سکے۔ اس واقعہ غا پیش آن توں بعد علاقہ مانہہ تلا شی کا روائی شروع کر دتی ہے تا نجے کسی وی قسم غا آن آلا خطرہ نانہہ ٹالیو جا سکے۔

LG Election

لیفٹنٹ گورنر منوج سنہا نے کہیو ہے جے سرکار لوکاں غی امید اں نانہہ پورو کرن تے اُن غی مدد کرن بارے پوری طرح تیار ہے۔ جس واسطے تمام تر ضروری اقدام چایا گیا ہیں۔ جناب سنہا نے کہیو جے جلد توں جلد مرکزی زیر انتظام علاقہ مانہہ بلدیاتی اداراں غا چناؤ وی کرایا جائیں گا۔ ایل جی موصوف نے کہیو جے او بی سی کمیشن کی رپورٹ غی اڑیک ہے تے اُس غا اُن توں بعد او بی سی طبقہ واسطے سیٹ مختص کی جائیں گی۔ جناب سنہا نے کہیو جے سرکار لوکاں غی امید اں ور کھلی اُترن واسطے مناسب قدم چاہ رہی ہے تے ایل جی دفتر لوکاں نانہہ یقین دے جے ہم لوکاں غی بہتری تے مدد کرن بارے پوری طرح تیار ہاں۔

LG Terrorist

جموں کشمیر غا لیفٹنٹ گورنر منوج سنہا نے کہیو ہے جے گا ندریل دہشت گردانہ حملو جس مانہہ 7 لوکاں غی موت واقع ہوئی تھی، اُس حملہ مانہہ 2 بیرونی دہشت گرد بون غو امکان ہے۔ جہیڑا جے شمالی کشمیر غا بانڈی پورہ ضلع توں دراندازی کر غے علاقہ مانہہ داخل ہوا تھا۔ ذرائع غے مطابق گذریا اتوار آلے تہاڑے اس دہشت گردانہ حملہ مانہہ اک ڈاکٹر تے 6 دیگر مزدور اس حملہ مانہہ ہلاک ہو گیا تھا۔ یاد رہے جے سرینگر لہیہ قومی شاہراہ ور اک ٹنل غی تعمیر آلے پا سے دہشت گرد اتوار آلے تہاڑے داخل ہو گیا تھا۔ اسے دوران اُنہاں نے ٹنل مانہہ کم کرن آلا مزدوراں ور شام نانہہ اپنا کیمپ در واپس آتاں واں حملو کر دتوتھو۔ جناب سنہا نے کہیو جے حفاظتی دستاں نانہہ پوری آزادی دتی ہے جے وے دہشت گرداں نانہہ مکاویں۔ جناب سنہا نے مزید کہیو جے جلد ہی دوہاں دہشت گرداں نانہہ مارمکایو جائے گا۔

Rumors Non Local

انتظامیہ غی طرفوں غیر مقامی کارکنان نانہہ کشمیر چھوڑن ور مجبور کرن آلی افواہاں نانہہ روکن خاطر ڈویژنل انتظامیہ کشمیر نے ایسی خبراں نانہہ بے بنیاد قرار دتو ہے۔ اک سرکاری بیان غے مطابق ڈویژنل انتظامیہ نے دسیو ہے جے وادی مانہہ انتظامیہ نے دسیو ہے جے وادی مانہہ غیر مقامی کارکنان غی حفاظت نانہہ یقینی بنان خاطر تمام ضروری اقدام کیا گیا ہیں۔ انتظامیہ نے عوام نانہہ اپیل کی ہے جے چوٹھی افواہ پھیلان توں باز رہیں تے وادی غا امن نانہہ برقرار رکھن خاطر اپنو تعاون وی پیش کریں۔

یہ خبر تم آکاشوانی جموں تیں سُن رہیا ہیں خبراں غا باقی حصہ نال اشفاق عذیم۔

Dy CM Youth

نائب وزیر اعلیٰ سریندر کمار چودھری نے اج کہیو ہے جے سرکار نوجواناں واسطے ایسا موقعہ پیدا کرن غو ماحول تیار کر ليو ہے جس مانہہ تکنیکی ہنر غے ذریعے نوجوان اپنی روزگار حاصل کر سکیں، تے اس طرح اُن غی آمدنی وی بدھے گی تے نال ہی وے دوجاں واسطے وی روزگار دین غا موقعہ پیدا کریں گا۔ جناب چودھری اج وراثتی دستکاری غا تربیت کاراں گا وفد سنگ گل بات کر رہیا تھا۔ وفد نے نائب وزیر اعلیٰ سنگ آئی ٹی آئی ادارہ مانہہ نوجواناں واسطے داخلہ بارے وی گل بات کرن توں علاوہ سٹارٹ اپس تے نوجواناں نانہہ روزگار فراہم کرن غی سکیمیں بارے وی گل بات کی۔ جناب چودھری نے وفد نانہہ یقین دھانی کراتاں واں کہیو ہے اُن غا تمام مطالبہ حل کیا جائیں گا۔

Dy CM Condolence

گگن گیر مانہہ ہون آلا المناک دہشت گردانہ حملہ غے بعد جموں کشمیر غا نائب وزیر اعلیٰ سریندر کمار چودھری نے اس وحشیانہ حملہ غی شدید مزمت کرتاں واں دکھ غو اظہار کیو ہے۔ نائب وزیر اعلیٰ نے دسیو جے متاثرین خانداناں سنگ ہم شانہ پشانہ کھلا ہاں تے لیفٹنٹ گورنر اس مشکل وقت مانہہ ضروری مدد فراہم کریں گا۔ انہاں نے مزید دسیو جے وزیر اعلیٰ عمر عبداللہ نے حملہ مانہہ شہید ہوا فرد ششی ابرول غی آخری رسومات خاطر انہاں نانہہ جموں منتقل کیو ہے تے اہل خانہ سنگ بھر پور امداد غی یقینی دھانی وی کی ہے تے نال متاثرہ غی بیوہ نانہہ نوکری غی پیشکش وی کی جانے گی۔

PM Russia

وزیر اعظم نریندر مو دی کزان مانہہ پلک توں شروع ہون آلی 16 ویں برازیل، روس، بھارت چین، تے جنوبی افریقہ یعنی برکس گا اجلاس مانہہ شرکت کرن خاطر روس غا دو روزہ دورہ وریج گیا ہیں۔ اس اجلاس غو موضوع ”عالمی ترقی تے سلامتی خاطر کثیر الجہتی نانہہ بنانو“ ہے۔ پھر جے کزان مانہہ آکاشوانی غا نمائندہ سنگ گل کرتاں واں روس مانہہ بھارتی سفیر وینے کمار نے دسیو ہے جے یوہ سربراہی اجلاس اہم عالمی مسائل وریج بات چیت کرن خاطر رہنماواں نانہہ اک اہم پلیٹ فارم فراہم کرے گا۔ انہاں نے مزید دسیو جے وزیر اعظم نریندر مو دی روسی صدر سنگ دو طرفہ معاملات وریج تبادلہ خیال کریں گا۔

Jatinder Samuhik Charcha

مرکزی وزیر ڈاکٹر جتندر سنگھ نے کہیو ہے جے مشن کرم یوگی نے نظم و نسق مانہہ اک نوی ثقافت نانہہ فروغ دتو ہے۔ جہیڑو جوابدہ، متحرک تے عصری بھارت سنگ وابستہ ہے۔ وے جاتے روز نوی دہلی مانہہ وزارت عمل، عوامی شکایات بارے افسران خاطر سموہک چرچا سنگ خطاب کرتاں واں بول رہیا تھا۔ انہاں نے کہیو جے مشن کرم یوگی قاعدہ تے کردار غی متوازی تبدیلی غی نشاندہی کرے تے اس گل ورتوجو مرکوز کرے جے سول سرونٹ نہ صرف قواعد غی پابند ہے بلکہ اُس نانہہ ذمہ داریاں غو پابند وی ہونو چاہیے۔ مہارا نامہ نگار نے دسیو ہے جے سموہک چرچا غو مقصد وزارت غے اندر سارا محکماں غا افسران نانہہ جوڑے غے اک منتخب موضوع وریج معلومات فراہم کرنو ہے۔

Shah Farmers

مرکزی وزیر داخلہ امت شاہ نے آج کہیو ہے جے بھارت دوجا سفیدی انقلاب غی تیار کر رہیو ہے۔ جس غو مقصد ملک غا 8 کروڑ دودھ سنگ جوڑنو ہے۔ آج انند مانہ قومی ڈیری ترقیاتی بورڈ غی ڈائمنڈ جُبلِی غی تقریب سنگ خطاب کرتاں واں جناب شاہ نے کہیو ہے آجاں توڑی دودھ مہیا کرن آلا کساناں وچوں صرف 1.5 کروڑ افراد ہی کاپرٹنیو سنگ جُڑیا وا ہیں جد کہ متا سارا آجاں وی مشکلات غا شکار ہیں۔ جناب شاہ نے مزید دسیو جے بھارت غو ڈیری سیکٹر 6 فیصد غی سالانہ شرح توں ترقی کر رہیو ہے۔ جہیڑو جے عالمی اوسط توں متو ہے۔ یا د رہ جے وزیر داخلہ امت شاہ نے بی جے پی حکومت غا اگلا 5 بہراں مانہ ملک مانہ 2 لکھ کاپرٹنیو قائم کرن غا منصوبہ غی وی نقاب کشائی کی ہے۔

DDC Cpx Budget

ضلع ترقیاتی کونسل غا چیرمین جموں بھارت بھوشن نے جا تے روز کیپکس بجٹ 25/2024 غے تحت ترقیاتی کماں غی پیش رفت با رے جائزو لین خاطر کونسل غی اک میٹنگ غی صدارت کی۔ میٹنگ مانہ بجلی ترقیات، جل شکتی، اسکول تعلیم، تے صحت غے نال نال بکھ بکھ کماں غو جائزو لیو۔ انہاں نے جل جیون مشن نانہ بروقت انجام دین ور وی زور دتو۔ تے محکمہ نانہ بدائیت جا ری کیں جے وہ ترقیاتی کماں نانہ ویلے سر مکمل کریں۔ انہاں نے افسراں ور زور دتو جے وے صحت غی دیکھ بھال خاطر بنیا دی ڈھانچہ نانہ مضبوط بنان ور توجو دین تے خاص کر غے دیہی علاقہ مانہ صحت با رے مرکزاں غی تعداد بدھان ور وی زور دتو۔ اجلاس غے دوران پانی غا پمپ وغیرہ تے آبپاشی با رے لفٹاں غی مرمت خاطر فنڈ مختص کرن غی قرارداد وی منظور کی گئی۔
